

2008 TRAFFICKING IN PERSON REPORT MADAGASCAR

MADAGASIKARA (SOKAJY 1)

Madagasikara dia firenena iaingan'ny vehivavy sy ankizy niharan'ny fanondranana olona an-tsokosoko anatiny, ka nampanaochina asa an-tery sy noterena hivaro-tena. Nisy ankizy, indrindra ireo avy any ambanivohitra, izay niharan'ny fanondranana olona an-tsokosoko hiasa an-trano, hoterena hivaro-tena, hampanaochina asa an-tery ho an'ny mpivaro-mandeha ary hanao asa teo amin'ny fitrandrahana harena an-kibon'ny tany. Nisy koa tovovavy niharan'ny fanondranana olona an-tsokosoko mba hiasa an-trano sy noterena hivaro-tena. Nisy ny olana momba ny fizahan-tany mamoafady amin'ny ankizy tany amin'ireo tanàn-dehibe any amoron-tsiraka, anisan'izany Toamasina, Nosy Be, sy Diego Suarez, ary tao Antananarivo renivohitra, ka ankizy maro no fanatra fa nivaro-tena; misy koa ny noraisina tao an-drenivohitra ka nofitahina hoe hiasa ho mpandroso sakafo sy mpanadio trano nefo noterena hivaro-tena tany amoron-tsiraka taty aoriana. Ireo firenena tena fipoiran'ireo mpizaha tany mamoafady amin'ny ankizy dia Frantsa, Italia, Espagne, Allemagne, Suisse, nosy Maorisy ary La Réunion. Matetika dia tovovavy no niharan'ireo heloka ireo, saingy nitombo isa ny tatitra momba ny vahiny lahy mitady hiray ara-nofo amin'ny tovolahy tsy ampy taona. Misy koa fanondranana ankizy an-tsokosoko hoterena hivaro-tena voalaza fa nitranga ka nahitana tsikombakomba tamin'ny olona ao amin'ny fianakaviana, namana, mpitatitra, mpitonandra vahiny sy mpiassa amin'ny hotely. Nisy tompon'andraikitra ara-pitondrana nitatitra fa misisika mafy ireo ankizy niharan'ny heloka ireo, na ny ray aman-dreniny, mba tsy fampiharana ny lalàna satria hisy fiantraikany amin'ny fidiram-bolan'ny fianakaviana izany.

Ny Fitondrana Malagasy dia manaraka tanteraka ny fenitra farafahakeliny ho amin'ny famongorana ny fanondranana olona an-tsokosoko. Mbola i Madagasikara no lohalaharana eo amin'ny ady amin'ny fanondranana olona an-tsokosoko aty amin'ireo firenena any amin'ny ambanin'ny Sahara, sady naneho fahavononana lehibe hamaha ny olan'ny fizahan-tany mamoafady amin'ny ankizy. Nandritra ny vanim-potoana voakasiky ny tatitra dia nampitomboan'ny fitondrana izay tsy izy ny ezaka ataony ho fampiharana ny lalàna, anisan'izany ny famoahana lalàna an-tsipirihany iadiana amin'ny fanondranana olona an-tsokosoko sy ny fanasaziana izay tompon'andraikitra ara-pitondrana voarohirohy ho nanampy tamin'ny fanondranana olona an-tsokosoko.

Torohevitra ho an'i Madagasikara: Mampiasa ilay lalàna vao nivoaka iadiana amin'ny fanondranana olona an-tsokosoko mba hitoriana sy hanasaziana izay mpanondrana olona an-tsokosoko; mametraka rafitra ara-panjakana hahafahan'ireo tompon'andraikitry ny fampiharana ny lalàna mirakitra an-tsortra ireo tranga momba ny fanondranana olona an-tsokosoko sy manoro lalana hahazoana fanampiana ho an'ireo niharan'ity heloka ity; ary manohy ny fanadihadiana sy fitoriana ireo tompon'andraikitra ara-panjakana

ahiahiana ho niray tsikombakomba tamin'ireo mpanondrana olona an-tsokosoko na nandray kolikoly mba tsy hamborahany heloka mifandraika amin'ny fanondranana olona an-tsokosoko.

Fitoriana

Nandritra ny vanim-potoana voakasiky ny tatitra dia nihatsara tokoa ny ezaka nataon'i Madagasikara hampiharana ireo lalàna iadiana amin'ny fanondranana olona an-tsokosoko, indrindra ny fanavaozana ny lalàna sy ny fandraisana fepetra hanasaziana izay tompon'andraikitra ara-pitondrana voarohirohy tamin'ny resaka fanondranana olona an-tsokosoko. Tamin'ny volana Jolay 2007 ny Ministeran'ny Asa dia namoaka didy hitsivolana mitanisa ireo endrika fampiasana zaza tsy ampy taona voararan'ny lalàna, anisan'izany ny fivarotan-tena, ny fanadevozana ao an-tokatrany ary ny asa an-tery, sady manazava ny fampiharana ny fehezan-dalàna mifehy ny asa ho an'ireo ankizy miasa. Tamin'ny volana Aogositra ny Parlemanta dia namoaka lalàna manasazy ny fanerena ankizy hivaro-tena ka manambara ny sazy miandry izay olon-deihbe manery ankizy hivaro-tena. Tamin'ny volana Desambra 2007 ny fitondrana dia namoaka lalàna an-tsipirihany mandrara ireo endrika rehetra isehoan'ny fanondranana olona an-tsokosoko, na dia ny fanondranana olona an-tsokosoko hivaro-tena ihany aza no efa namaritany sazy mazava; ka roa taoa an-tranomaizina hatramin'ny fitànanana an-tranomaizina mandrapahafaty no sazy voafaritra, sazy izay neverina fa hentitra sy mifanentana tsara amin'ny sazy voafaritra ho an'ireo heloka bevava mitovitovy aminy. Manambara ny Andàlana 262 ao amin'ny Fitsipi-dalàna mifehy ny asa fa heloka ny fanondranana olona an-tsokosoko ho an'ny asa, izay mahavoasazy herin-taona hatramin'ny telo taona an-tranomaizina. Ary satria tsy misy ny ivon-toerana mandravona ireo tatitra momba ny raharaha-m-pitsarana, dia tsy afaka nanome antontan'isa momba ny fampiharana ny lalàna ho an'ny taona 2007 ny fitondrana. Tany amin'ny toerana be mpizaha tany sasany, dia hita fa hendratra ireo polisy teo an-toerana hanenjika ireo mpanondrana ankizy an-tsokosoko hivaro-tena sy ireo mpizaha tany manao fihetsika mamoafady amin'ny ankizy, angamba noho ny kolikoly efa lalim-paka, ny faneriterena avy eo an-tanàna, na ny tahotra hanohintonhina ny fifandraisani'ny Madagasikara amin'ny firenena hafa. Na izany aza anefa, nandritra ny vanim-potoana voakasiky ny tatitra dia nosazian'ny fitondrana ireo tompon'andraikitra voarohirohy mivantana na an-kolaka tamin'ny fanamoràna ny fanondranana olona an-tsokosoko sy ny olana mifandraika aminy eo amin'ny fizahan-tany mamoafady amin'ny ankizy. Tao anatin'ny fitoriana ilay teratany Suisse, dia nasain'ny birao miady amin'ny kolikoly eto Madagasikara ihany koa ny Chef District tao Nosy Be noho ny nivarotany karapanondro sandoka ho an'ny ankizy tsy ampy taona, toa izany koa ny Filohan'ny Fitsarana sy ny procureur teo an-toerana noho ny nanomezany sazy maivana dia maivana ho an'ilay teratany Suisse sy izay mpizaha tany hafa nanao fihetsika mamoafady tamin'ny ankizy. Tamin'ny volana Jolay 2007 dia nesorin'ny Ministeran'ny Fitsarana tamin'ny toerany ny procureur sy ny Filohan'ny Fitsarana tao Fort Dauphin noho ny tsy nahombiazany tamin'ny fanenjehana ireo mpizaha tany araka ny lalàna. Nandritra ny vanim-potoana voakasiky ny tatitra dia nisy ihany koa ny fiaraha-miasa navitrika nataon'ny fitondrana tamin'ny firenena hafa teo amin'ny fanadihadiana sy fitoriana nifandraika tamin'ny fanondranana olona an-tsokosoko. Tamin'ny volana Novambra 2007 dia nisy mpitsara Frantsay roa tao La

Réunion nesorin'ny tompon'andraiki-panjakana frantsay tamin'ny toerany noho ny niraisany tsikombakomba tamin'ny fizahan-tany mamoafady tamin'ny ankizy taty Madagasikara; ny polisy Malagasy no nitarika ny fanadihadiana. Tamin'ny volana Jolay 2007 dia nisy ny fandaharana naharitra herin-taona notontosain'ny fitondrana ka niarahany niasa tamin'ny UNICEF sy ny fikambanana tsy miankina iray teto an-toerana, ka nanofanana polisy, zandarmaria, mpitsara ary mpiasan'ny raharaha ara-tsorialy momba ny fiarovana ny ankizy, anisan'izany ny fomba famantarana ny endrika fanondranana olona an-tsokosoko, ny fomba fanatontosana ny fanadihadiana ary ny fitoriana eny amin'ny fitsarana.

Fiarovana

Notohizan'ny fitondrana ny ezaka nataony hanampiana ireo niharan'ny fanondranana olona an-tsokosoko. Nandritra ny vanim-potoana voakasiky ny tatitra dia nahatratra 105 ny isan'ireo niharan'ny fampiasana zaza tsy ampy taona sy fanondranana olona an-tsokosoko nahazo fanampiana tany anivon'ireo Centres d'Accueil tantanan'ny fitondrana ao Antananarivo, Toamasina, sy Toliara; ary naverin'ireto farany tany amin'ny sekoly na ivon-toerana fanofanana arak'asa. Ny mpitsabo any amin'ireo Centres d'Accueil no nanolotra fitsaboana ara-batana sy torohevitra ho an'ireo niharan'ity heloka ity, ary ny mpanara-maso avy amin'ny Ministeran'ny Asa kosa dia nanome fiofanana momba ny fitadiavana asa. Misy ny Centre d'Accueil fahaefatra izay amboarina any Nosy Be amin'izao fotoana izao, ka nahazoana fanampiana avy amin'ny firenena vahiny. Ary satria tsy mbola misy rafitra ofisialy hanoroana lâlana ireo niharan'ny fanondranana olona an-tsokosoko ho any amin'izay fikambanana tsy miankina afaka mikarakara azy, dia ireo Centres d'Accueil telo tantanan'ny fitondrana sy ireo tamba-jotra 14 miaro ny ankizy najoron'ny UNICEF (ahitana solotena avy amin'ny birao ara-panjakana, fikambanana tsy miankina ary tompon'andraikitry ny fampiharana ny lalâna) no nandray izay andraikitra izay tany amin'ireo tanân-dehibe manerana ny firenena. Ny tamba-jotra fiarovana ny ankizy ao Diego Suarez ohatra dia nampivondrona tompon'andraikitra niisa 22 avy amin'ny fitondrana sy fikambanana tsy miankina mba handray an-tâhana ny raharahan'ireo ankizy niharan'ny heloka, miainga amin'ny fitoriana voalohany hatrany amin'ny fotoam-pitsarana, tafiditra ao amin'izany ny fanampiana ara-pitsaboana, ny torohevitra ary ny toromarika momba ny lalâna ho an'ireo niharan'ny heloka ireo. Nisy koa ny ivon-toerana mpanoro hevitra notantanan'ny fikambanana tsy miankina maro ary notohan'an'ny Ministeran'ny Fitsarana sy ny Fahasalamana ao Antananarivo sy Fianarantsoa, izay nanome fanampiana ara-psykolojika sy toromarika momba ny lalâna ho an'ireo ankizy niharan'ny fanararaotana sy fanondranana olona an-tsokosoko ka noterena hivaro-tena. Ny ray aman-drenin'ireo ankizy niharan'ny fanondranana olona an-tsokosoko koa dia nomena torohevitra momba ny lamina arahina raha hametraka fitoriana any amin'ny fitsarana, saingy tsy nanaraka izany ny ankamaroan'izy ireo, noho ny tahotra valifaty na noho ny onitra voarainy tamin'ilay nahavita ny heloka. Tsy nosazian'ny fitondrana ireo niharan'ny fanondranana olona an-tsokosoko ka nanao fandikan-dalâna vokatry ny nanondranana azy an-tsokosoko; ary nampirisihin'ny fitondrana ireto farany hanolo-tâhana mandritra ny fanadihadiana sy fitoriana ireo nahavita heloka taminy. Ny fitondrana dia tsy manolotra vahaolana hafa araka ny lalâna ankoatry ny fandroahana ireo niharan'ny fanondranana olona an-tsokosoko ho any

amin'ny firenena mety hiatrehany hasarotana na fanenjehana; ary mety haverina any amin'ny firenena nihaviany izay vahiny nihar'an'ny fanondranana olona an-tsokosoko nefo tsy manana taratasy ara-dalàna, raha misy izany tranga izany.

Fisorohana

Nitombo koa nandritra ny taona ny ezaka ataon'ny fitondrana hisorohana ny fanondranana olona an-tsokosoko, tamin'ny alàlan'ny fanamafisany ny fanentanana ny besinimaro amin'ny ady amin'ny fanondranana olona an-tsokosoko, ka nahatratra an'arivony ny mponina nanaovany fanentanana. Tamin'ny taona 2007 ny Ministeran'ny Fitsarana dia nanatontosa fanofanana momba ny fanondranana ankizy an-tsokosoko sy ireo endrika ratsy indrindra isehoan'ny fampiasana zaza tsy ampy taona, ho an'ny solotena niisa 70 avy amin'ny tamba-jotra miaro ny ankizy sy fikambanam-behivavy na fikambanana tsy miankina, ary ho an'ny mpitsara, mpisolo vava ary mpiasan'ny fitsarana niisa 120. Nisy koa ny fanentanana nokarakarain'ny ministera ho an'ny mponina niisa maherin'ny 200 any amin'ireo tanàna na faritra matetika itrangan'ity heloka ity ao andrenivohitra, ho an'ny mpiasan'ny hotely miisa 10 ao Nosy Be, sy mpanjifa niisa 1.000 any amin'ny birao mpanome torohevitra araka ny lalana ao Antananarivo, Mananjary, sy Fort Dauphin. Ankoatr'izay dia nisy ireo tompon'andraikitra avy amin'ny ministera niseho tamin'ny fahitalaviry ny fanjakana sy niteny tamin'ny fandaharana tamin'ny onjam-peo mba hanabe ny besinomaro momba ilay lalàna vaovao iadiana amin'ny fanondranana olona an-tsokosoko. Nisy koa ny boky kely momba ny ady amin'ny fanondranana ankizy an-tsokosoko nozarain'izy ireo tany amin'ny Antenimiera, sy ny boky miisa 1.000 mirakitra ny fehezan-dalàna momba ny heloka bevava, nozrainy ho an'ny polisy manerana ny firenena. Mbola notohizan'ny Sekreteram-Panjakana misahana ny Filaminam-bahoaka ny ezaka nataony hanabeazana ny mpianatra any antseky momba ny fivarotan-tena ataon'ny ankizy sy ny lalàna mikasika ny ny fiarovana ny zaza tsy ampy taona. Ny Sampandrahahaha misahana ny zaza tsy ampy tao Fort Dauphin dia namoaka fampitandremana fa finday no nampiasain'ny olon-dratsy hiantsoana ireo ankizy nihar'an'ny fanondranana olona an-tsokosoko; ka dia sekoly maro no namoaka fandrarana avy hatrany tsy hahazoan'ny mpianatra mampiasa finday. Niaramiasa tamin'ny Federasiona Malagasin'ny Baolina kitra ny Ministeran'ny Asa mba hanatontosa ezaka hanoherana ny fampiasana zaza tsy ampy taona tao Mahajanga sy Sambava, ary nisy ny Komitim-Paritra Miady amin'ny Fampiasana zaza tsy ampy taona niisa roa amboniny vao najorony tany amin'ny morontsiraka atsimo andrefana sy morontsiraka atsinanana. Tamin'ny volana Jolay 2007 dia nisy ny fanadihadiana isantokatrano manenika ny firenena notontosain'ny sampanasam-panjakana mikasika ny antontanisa, ka niarahany niasa tamin'ny ILO-IPEC, momba ny fampiasana zaza tsy ampy taona sy fanondranana ankizy an-tsokosoko. Tamin'ny volana Desambra 2007 ny fitondrana dia namoaka ny Lamin'asam-pirenena hiadiana amin'ireo endrika rehetra isehoan'ny herisetra amin'ny ankizy, anisan'izany ny fanondranana ankizy an-tsokosoko.

Notohizan'ny fitondrana ny ezaka fanentanana nataony nanenika ny firenena hiadiana amin'ny fizahan-tany mamoafady amin'ny ankizy, ka nisy ny hetsika maro ho fampiharana ny lalàna notontosainy nandritra ny taona voakasiky ny tatitra. Nisy ny teratany Suisse NAHAZO sazy mihantona dimy taona an-tranomaizina ka noroahina

hivoaka ny firenena. Nisy koa ireo teratany Morisiana roa nahiahiana ho nanery zaza tsy ampy taona hivarо-tena tao Nosy Be, ka noroahina hivoaka ny firenena. Mbola nisy koa Morisiana roa sy Allemand roa voasambotra saingy nafahana taty aoriana noho ny tsy fahampian'ny porofo. Ao Toamasina dia misy vahiny tompon'ny hotely sy trano fisakafoanana iray miandry didim-pitsarana rehefa voampanga ho nanampy tamin'ny fanerena vehivavy mpandroso sakafo telo hivarо-tena, ka ny roa tamin'ireo dia tovovavy latsaky ny 18 taona. Nandray fepetra amboniny ny polisy hisorohana ny fizahan-tany mamoafady amin'ny ankizy, ka nakatony tanteraka ny trano maro filanonana amin'ny alina tao Nosy Be sy Fort Dauphin noho ny namelany zaza tsy ampy taona hiditra ao aminy. Nisy koa ireo sary fanentanana lehibe napetaky ny fitondrana any amin'ny seranam-piaramanidina sy hotely maro mba hampitandremana ireo mpizaha tany mamoafady, anisan'izany ny fampitandremana manenika pejy iray manontolo ao amin'ilay boky kely omen'ny biraon'ny fadin-tseranana ireo vahiny vao tonga. Tamin'ny taona 2007 ny Filoha Malagasy dia nanao fampitandremana hentitra ho an'izay mikasa hanao fizahan-tany mamoafady, ka nanambarany fa tsy maintsy hampiharina ny lalàna mamaritra ny sazy momba izany.